

Ni Chivinti yu Jalaqts'oqnil Pablo Ixlapanakni Dios yu Tavilanal Éfeso

Ni Pablo jalakmastak'ay ixlapanakni
Dios yu tavilanal Éfeso

1 ¹ Kit'in kPablo ixtamalaqachan Jesucristo va por chuncha naul ni Dios. Klamastak'ayau ni uxiknank'an yu vilanant'ik laka putaulan Éfeso yu ixnavin Dios unt'at'ik yu ox t'aylhip'inat'ik lhakapu'anan ch'antaun kun Cristo. ² Katamayaynin yu ox y katamalakaulan ni kimPay Diosk'an kun kiJalhachimo'onuk'an Jesucristo. ³ Ay kamakakal ni Dios yu ixPay kiJalhachimo'onuk'an Jesucristo. Ni yucha kintamalaqachanitan tachun yu ox yu alin lakt'iyau para ketsukuntik'an ni kijnan yu ukxuyanau ch'antaun kun Cristo. ⁴ La maqancha tejkán jantuka'ixmakakan ni lakamunukpa', vananaj exnicha ixkintalaksaktancha ni va ch'antaun ixjuu kun Cristo para vamun yu' ixnavin kajuu y jantu kintamuk'anin kilaqtaqalk'an. Kintapaxkan ⁵ y xlhuyucha la maqancha ixnajunta kintamakayan sas'at'an por yu makal Jesucristo porke chuncha ix'achaniy ixmakal. ⁶ Va chuncha ay kamakakal ni Dios por yu ay ixjamapayninti yu kintaxtaqñin por ixjatsukunti ists'al yu apalay achaniy. ⁷ Ni kijnank'an yu lhitanumanau kun Cristo va kintamalaqtaxtun por mapalal kun ixjak'alna. Xlhuyucha kintamalaqmixiniyan kintalaqalhink'an por yu ay ixjamapayninti. ⁸ Kintalalhavaniyan ixjamapayninti y kintaxtaqñin tachun jatalaniti ali jatapastak'ati. ⁹ Kintamamispayniyan yu maqancha ixpastak'a kamakaya'. Jantu ixmispakan p'unaj pero ox lhilal kintamamispayniyan yu ixmakaputunta kun Cristo. ¹⁰ Ex tejkán kamina' ni anchanu' julchan va katapasaya' tachun yu ixnajunta ixmakal. Kamaxtoqni'oya' la ixpalhachimo'on ni Cristo tachun

yu alin, kaval lakt'iyau kaval lakamunukpa'.

¹¹ Va por Cristo kintapaxtoqniyan yu laj'oxi yu tapaxtoqniy sas'at'an Dios. Ni yucha la maqancha ixlhilkama'atachal ni kijnan yu kintalaksaknitán. Va chuncha ixnajunta kamakal y vamun yu' lay makay tachun yu yucha najun.

¹² Chuncha makal para ay kamakakal ni Dios la ketsukuntik'an ni kijnan yu p'unaj ixpaxkan'itau yu kalaqa'iu kun Cristo.

¹³ Tejkán uxiknán vachu asmakt'ik yu laqsaval yu ox chivinti yu p'ulaqt'axt'ut'ik ex va lhak'ap'up'int'ik. Ex por ch'antaun unt'ik kun Cristo, ni Dios va taxtaqñin ni Espíritu Santo yu naul ni laqsaval kaxtaqya' para kaseyolak'ant'ikcha la milhitsukunuk'an. ¹⁴ Xtaqnikantaucha ni Espíritu Santo para kapuk'atsau ni Dios laqsaval kintaxtaqniyan yu paxtoqniy sas'at'an. Kintaxtaqniyan tejkán kalaqchaanacha ni anchanu' julchan para katalaqtaxtu'ol ixlapanakni yu laksaklhi. Ex chuncha kato'oyakana' por ix'oxixtu.

Ni Pablo tapayniniy Dios por yu
tavilanal Éfeso

¹⁵ Kintajuniyan ni ox lhak'ap'up'inat'ik kiJalhachimo'onuk'an Jesús y vachu ox jalakp'axk'ayat'ik ixlapanakni Dios tus chavaycha. ¹⁶ Xlhuyucha jantu ijkastaknan ixtaqnika lhimalaqpuchuncha ni Dios por uxiknán, va si klapastak'au tejkán ksk'in Dios. ¹⁷ Ktapayniniyan ni Dios yu ixPay kiJalhachimo'onuk'an Jesucristo, vamun yu ay jaPay junita. Va ksk'in para kaxtaqñin jatapastak'ati yu minchal kun ix'Espíritu para k'amala'asit'ik yu kintamasuniyan Dios para apalay ox kamisp'at'ik. ¹⁸ Vachu ksk'iniyan Dios katamasuniyan yu ts'anqay la melhanutk'an para katapulku'ol mijatapastak'atik'an.

Chuncha k'amisp'ayapitik yu ox junita yu p'akxan'iyat'ik yu talhijunta'in ni Dios. Ex k'amisp'ayapitik yu ayaj ay maqaliti yu kalaqxtaqniya' ixlapanakni. ¹⁹ Vachu' k'amisp'ayapitik yu ay ixtap'asta, yu jantu alin ta'an katamaktal, yu kinta'aqtayjuyan ni kijnank'an yu lhakapu'anau. Ni anchanu ay tap'asta va yucha yu putapatsay ni Dios. ²⁰ Ni anchanu tap'asta va yucha yu pumajkujuchoqol ni Cristo tejkan ixnitacha y lhi'ulal la ixlhijakanaj ancha lakt'iyen. ²¹ Chuncha ni Cristo va apalay ay junita xajantu tachun ni jalhachimo'onun ali mach'alk'akni ali yu laj'ay ukxtinin lakt'iyen ali yu ancha talhit'ajun tap'asta. Chuncha vachu' apalay ay kato'oyakana' ixtaqa'uti xajantu tachun yu lay lhimapaqa'ukan, mas va yu aniy lakamunukpa' mas va yu ka'alinaka'. ²² Ni Dios maqxtaqni'ol la ixtamaka' ni Cristo tachun yu alin y vachu' jamaqxtaqnil tachun ixlapanakni yu talhakapu'an para yucha xa'aqtsul kaval. ²³ Yu ixlapanakni ni Cristo va ixlakatunaj tajunita y chuncha taqayntsaycha ni yucha y Cristo laqentsa'ojoy tachun yu alin.

**Ni Dios kintamalaqtaxtuyan por
ixjamapayninti**

2 ¹ Yu uxiknan va tacha ixnit'at'ikcha la metsukuntik'an por mintalaqalhinik'an ali milaqtaqalk'an. ² Chuncha ixt'i'ukxuyanant'ik y ixt'aylhip'inat'ik xatin aniy lakamunukpa' tacha lhinajun xa'ukxtin ni aqmoqxnu' yu takyaut'ajun ta'akchun ni lakamunukpa'. Ni anchanu' espíritu va yucha yu jalakmap'asniy ni lapanakni yu jantu taqalasmata Dios. ³ Tacha yu'uncha tajunita vachu chun ixt'i'ukxuyanau ni kintachunk'an. Ixmakayau tacha tamakay yu vali'iy lapanakni, ixmakayau yu ixlhijnajun kilakatunajk'an ali kijatapastak'at'k'an. Chuncha ixkintapaxtoqniyan kalaqa'iu ixlhilukuj ni Dios vachu tacha yu tapaxtoqniy tachun yu alati. ⁴ Pero Dios yucha la ay ixjamapayninti y ayaj kintapaxkayan. ⁵ Xlhiyucha kintamajkujuchoqon ch'antaun kun Cristo mas ixnitaucha la ketsukuntik'an por kintalaqalhinik'an. Laqtaxtutaucha por ixjamapayninti.

⁶ Kintamajkujuchoqon ch'antaun kun Cristo y ch'antaun kintat'a'ulan lakt'iyen. ⁷ Chuncha makal para katasul mas va tavanancha ni va la ay ixjama-payninti yu kintalhipaxkayan por yu makal ni Cristo Jesús. ⁸ Va tamapaynin y xlihyucha p'ulaqt'axt'ut'at'ik milhakapu'atk'an. Jantu va me'emank'an k'alaqt'axt'ut'ik, va ixlhache'evan ni Dios. ⁹ Jantu lay k'ap'ulaqt'axt'u por yu k'amak'at'i, xlihyucha jantu matichun lay ay makakan.

Ni Cristo kintama'oxamaktamin

¹⁰ Dios kintamakan. Va ch'antaun kun Cristo juntau xlihyucha kintamakan para kamakau yu laj'ox yu maqancha laksaklhi Dios para chuncha kaputi'ukxuntayau. ¹¹ Kap'ast'akt'ik ni uxiknan-k'an yu jantu israelitas k'a'unt'ik, va jantu ixlapanakni Dios ix'unt'at'ik porke chuncha p'uts'uk'ut'ik. La milakatunajk'an jantu kaxvililich'uk'up'uxnik'ant'ik, xlihyucha jantu ox ixtalaqts'inan ni israelitas yu jalakxvililichuk'unikanta la ixlakatunajk'an. ¹² K'ap'ast'akt'ik ni exnicha jantu ixlhit'anumanant'ik kun Cristo, y jantu ixlhit'anumanant'ik kun xalapanakni Israel. Chuncha jantu katapaxtoqnin kala'a'it'ik ni lhache'evan yu Dios jalakjunil kalaqxtaqniya' ixlapanakni. Ixt'i'ukxuyanant'ik lakamunukpa'. Jantu ixp'akxan'iyat'ik yu ox y jantu ixmisp'ayat'ik Dios. ¹³ Chavaycha ch'antauncha unt'at'ik kun Cristo Jesús. Mas p'unaj maqati ixt'aunant'ik kun yucha pero chavaycha ni Cristo tama'uksts'unitan por ixjak'alna.

¹⁴ Ni Cristo va yucha kintama'oxamaktamin. Yu oqqlaqt'uy ixjuntau, ni israelitas kun yu jantu israelitas kataval, va taun lapanaki kintamakan. Lakpuj'ol yu ixkintapulvaqyan yu ixmakay para t'alaxkaynin kajuu. ¹⁵ Chuncha makal ni Cristo tejkan nil la ixlakatunaj para jantucha kintapaxtoqnin ixlhachimo'on Moisés kun yu ancha ixlhinauncan. Chuncha makal para va oqqlaqauncha kintamakan para jantucha kalaxkajiu.

¹⁶ Chuncha val para ox kalalaqts'iu kun

Dios ni kijnank'an y tacha taun lakatunaj kajuu yu oqxlaqt'uy ixjuntau. Chuncha val por yu makal laka kurus y chuncha puma-mi'onil yu laxkayati.

17 Yucha kintakilaqpute'enichin yu ox chivinti yu masuy tas laycha ox kalalaqts'iu kun Dios mas uxiknan yu maqati ixt'aunat'ik kun Dios y vachu' kijnan yu israelitas yu uksts'uniy xakt'aunau. 18 Va ch'antaun juntau kun Cristo xlihyucha ni Espiritu Santo va aqstanchunin kinta'aq-tayjuyan kata'uksts'uniu kun kimPay Diosk'an mas va oqxlaqt'uy ixjuntau. 19 P'unaj jantu lay ixt'anuyat'ik kun ixlapanakni Dios, jantu ch'antaun ix'unt'at'ik. Pero chavaycha vachu' tapaxtoqniyan tachun yu tapaxtoqniy ixlapanakni ni Dios, va tacha lakataun machaqan unt'a-t'ik kun kijnan. 20 Tus tacha aqataun chaqa' mak'ak'angat'ik y tacha k'ap'ut'aya-t'ik ixchivintik'an ni lapanakni yu jalaq-malaqachal ni Jesucristo kun yu alati yu talaqpute'ey ixchivinti Dios. Ni Cristo Jesús va tacha yu xap'unaj chiyux yu tan'ajvil yu ox puyal xamatau. 21 Por yucha ni kijnan va tacha aqataun chaqa' yu ox talach'apata y chuncha ta'aya'an. Chuncha kajuu tacha taun lakatajtan yu ixnavin ni Jalhachimo'onu' Dios. 22 Ex chuncha uxiknan yu t'anumanant'ik kun Cristo va ch'antaun mak'ak'angat'ik kun kijnan tacha aqataun chaqa' ta'an vil ni Dios por yu ix'Espiritu Santo.

Ni Pablo xtaqnikal ixlhitapatsa para kalhixaqalal yu jantu israelitas kataval

3 1 Xlihyucha kit'in kPablo ktanun laka pach'in, va klhich'ikanta ni Cristo Jesús porke klaqqaqpute'enil ni la ox chivinti yu jantu israelitas kataval tacha uxiknan. 2 Uxiknank'an misp'ayat'ik ni lhitapatsa yu kilhilak'ulal ni Dios. Chuncha kixtaqnil ni aniy lhitapatsa kun ixjamapayninti para kalaqp'ute'enik'ant'ik ni ox chivinti. 3 Mas jantu ixmispakan, chavaycha ni Dios kimasunil yu ka'alina' astan. Chuncha klats'oqniucha mas jantu kun lhuu chivinti. 4 Tejkan k'ap'ut'e'eyapitik ni aniy karta yu klamalaqachaniyau ex lay k'amisp'ayapitik tacha

kpumalaqasil ni anchanu chivinti yu ixmaqsaqma'akanta yu lhichiviniy Cristo. 5 Ni anchanu jantu kalakmasu-nikal ni lapanakni yu maqancha ixta-t'ajun. Pero chavaycha ni Espiritu Santo jalakmasunitacha ni lapanakni yu malaqachal Jesucristo kun yu alati yu jalak-sakta ni Dios para katalaqqute'el ixchivinti. 6 Ni anchanu jatapastak'ati yu jantu ixmispakan va najun ni ox yu tapaxtoqniy ni israelitas vachu tapa-xtoqniy yu jantu israelitas kataval incha talhakapu'an ni ox chivinti. Va ch'an-taun tatanuy, va taun lakatunaj tajun, y va ch'antaun katalaqa'iya' tachun yu laj'ox yu Dios najun kalaqxtaqniya' por Cristo Jesús.

7 Por ixjamapayninti ni Dios kit'in kval ix'oqxtamati. Kimpaxtoqniy kaklaq-pute'el ni anchanu laj'ox chivinti. Yucha kimaqxtaqnil ni anchanu lhitapatsa y ki'aqtayjuy kun ixtap'asta. 8 Kit'in mas apalay lakat'uniy kunita xajantu tachun ixlapanakni ni Dios pero ikmaqxtaqnikal ni aniy jamapayninti. Yucha kimpaxtoqniy kaklaqpute'el tachun ixmaqaliti ni Cristo yu jantu lay mispa'okan para katak'atsal ni lapanakni yu jantu israelitas kataval. 9 Vachu' kimpaxtoqniy kaklaqmamalaqasinil tachun ni lapanakni tacha makal ni Dios. Ni Dios yu makal tachun yu alin yucha va aqts'i-yajcha ixt'ajun maqsaqmakan yu ixmakaputun astan. 10 Chuncha makal ni Dios para kamispakal yu pulhuu ixjatapastak'ati, para katamispal yu talhachimo'onun kun yu talhit'ajun tap'asta lakt'iyen, para chuncha katapumis-pal por ixlapanakni ni Dios. 11 Ni Dios aqts'iyaj chuncha ixpastakta ni chuncha kuna' y ixnajunta kamakaya' por kiJalhachimo'onuk'an Cristo Jesús. 12 Por yucha lay ta'uksts'uniniyau ni Dios jantu kun talhanti incha lhakapu'anau. 13 Xlihyucha klatapayniniyau ni jantu katapastak'un la kimaqanlqajnati yu klhitapasay por klamasuniu ixchivinti Dios ni uxiknan yu jantu israelitas k'a'unt'ik. Yu kimaqanlqajnati va ox kalhixajtachal por uxiknan.

Ixjamapayninti ni Cristo

14 Xlhiyucha iktatsoqoqtaniy ni Dios ixPay kiJalhachimo'onuk'an Jesucristo. 15 Va kun yucha minchal kintaqa'utk'an tachun yu ixlapanakni mas kaval lakt'iyān mas kaval lakamunukpa'. 16 Iksk'iniy Dios yu lhit'ajun kat'anaj ay ixmaqaliti para katalap'asnin kun lhuu ixtap'asta la metsukuntik'an por ix'Espíritu. 17 Va ksk'iniy para kataulal ni Cristo la melhanutk'an porke lhak'ap'up'inat'ik. Kat'aylhip'int'ik kun tachun japaxkanti yu minachal kun yucha. 18 Vachu ksk'iniy para lay k'amalla'asit'ik kun tachun ixlapanakni ni Dios ni tas junitacha yu ix'ayaxtu kun tachun ilmanixtu kun ixmuntan kun tachun ixtalmanixtu 19 yu ixjapaxkanti ni Cristo. Ni anchanu' japaxkanti la ay tus jantu lay mispa'okan. Va knajun jantu katats'anqanin tu'uchun la ix'oxixtu ni Dios yu kataxtaqniyan.

20 Dios lhit'ajun lhuu tap'asta para lay kamakal apalay lhuu axtoqnu' xajantu yu sk'ināu y vachu' yu pastak'au. Yucha tachun lay makay kun ixtap'asta. Anchanu' tap'asta va yu kinta'aqtayjuyan la ketsukuntik'an. 21 Ay kamakakal ni Dios por yu tamakay tachun ixlapanakni y vachu por yu makal Cristo Jesús. Ay kamakakal mas va tavanancha kaval, jantu aqtaun katamaktaya'. Va chuncha kavalcha.

Ch'antaun juntau incha tanuyau kun ni Espíritu Santo

4 1 Kit'in ktach'in kunita por klaqltapa-tsay kiJalhachimo'onuk'an. Chavaycha klatapayninyau ni kat'i'unt'ayat'ik makanan yu tapaxtoqniyan tacha talak'ulanin Dios y tajunta'in. 2 K'amalakk'at'unik'ant'ik la metsukuntik'an y lajqal'oxin k'a'unt'ik, ox k'alama'ant'aqnit'ik kun japaxkanti. 3 K'at'ap'asnit'ik para ch'antaun k'a'unt'ik tacha tamakanin ni Espíritu Santo para oxamaktaun kat'i'unt'ayat'ik. 4 Va taun lakatunaj juntau y vachu va taun Espíritu lhit'aunau, vachu chun tacha ni Dios tajunta'in para va putau k'ap'axkan'it'ik. 5 Va taun ni

Jalhachimo'onu' junita y va putau ni lhakapu'ati y va taun ni aqchaj'auti. 6 Va taun ni Dios yu kimPayk'an junita kintachunk'an. Yucha lhichimo'ojoy tachun yu alin y alin'ojota talaka'akchun y vachu alin'ojota la metsukuntik'an. 7 Pero kijnank'an mapaynikau qayntamin por qayntamin chuncha tacha naulcha ni Cristo ni kintaxtaqnin yu lay putapatsayau. 8 Va ts'oqkanta inchine':

Tejkan pataxtul talman ex jalaqmaqalhaja'ol tachun yu ixtaxkajiy y taxajchal tacha tach'inin, ex chuncha jalaqxtaqnil lhache'evan ixlapanakni.

9 ¿Vali'iycha najun ni pataxtul talman? Yu aniy naunputun ni p'unaj kitanul ta'an pulman lakat'un. 10 Yu kilachil aniy lakat'un va yucha yu pataxtuchoqol para apalay ay kaval ke tachun yu alin lakt'iyān, ex chuncha kun yucha ka'aqtsaun'ol tachun yu alin. 11 Por qayntamin kintaxtaqnin ni lhita-patsa yu kintapaxtoqniyan. Lati jalak'ulakal para kataval ixjamalaqachanti Cristo, lati para katalaqpute'el ixchivinti Dios, lati para katamasul yu ox chivinti, lati para katalhistaklhi yu talhakapu'an, y lati para katamalaninil. 12 Chuncha makal para jantu tu'uchun katats'anqanil ixlapanakni para katatapsanil y chuncha katalhaval ixlapanakni. Yu'uncha tacha ixlakatunaj Cristo tajunita. 13 Chuncha kataylha'al tus tejkan ch'antaun kajun'oyau la kilhakapu'atk'an y ch'antaun kamispa'oyau Sas'at'a Dios. Va tacha qayntaun kajuu yu jantu tu'uchun ts'anqaniy tus kalaqentsa'ojou para kalhitsuku'ojoo tachun ix'oxixtu ni Cristo. 14 Ex chuncha jantucha kajuu tacha s'at'an, yu tatapuchoqotsukuy y jalakhlilhaankan ataklhun la ixjatapastak'atk'an. Chuncha tapasay tejkan jalakmalanikan aputaun chivinti. Jalakmakanan ta'an ta'alīn lapanakni yu ayaj talhit'ajun ixpamakanunk'an. 15 Ts'anqay kataylha'au makanan yu laqsaval kun lhuu japaxkanti, chuncha

ka'ayn'au la ketsukuntik'an tus kacha'au tacha Cristo yu xa'aqtsul junita tachun yu lhakapu'anau. ¹⁶ Vamun por Cristo tatapatsay ixlapanakni. Va tacha lakatunaj yu ox laqxtoqnun, ox takilnunun ta'an talach'apata ta'an putapasay yu lha'an tap'asta. Tejkan talaka'akchun ni lakatunaxnan ox tapatsay ex ox ajin tachun ni lakatunaj kun lhuu japaxkanti.

Ni sast'i jatsukunti yu alin kun Cristo

¹⁷ Chuncha klalhijunau kun kiJalhachimo'onuk'an Jesús ni jantucha kat'i'ukxunt'ayat'ik tacha alati yu jantu israelitas kataval yu jantu tamispay Dios, yu tataylhaaniy makanan tacha ixjatapastak'atk'an yu jantu xtapal kaval. ¹⁸ Yu'uncha talhitt'ajun jatapastak'ati tus tacha kaputs'islhi la ixjatsukuntik'an, jantu tamispay ni jatsukunti yu xta'a Dios. Jantu tu'uchun tamispay va por p'ays tamakay ixjalhanutk'an. ¹⁹ Yu'uncha tus jantu tu'uchun talhimaxanan la ixjatapastak'atk'an. Vamun tatamaqxta'a para katamakal talaqalhin y tati'ukxuntayay makanan tachun yu jantu ox kun achati. ²⁰ Pero uxiknank'an jantu chun k'alanit'ik tejkan misp'at'ik ni Cristo. ²¹ Laqsaval asmakt'at'ikcha yu lhichiviniy Cristo y tejkan ixt'anumanant'ik kun yucha ex lanit'ik yu laqsaval chivinti yu minchal kun yucha. ²² Yu mimputsukuk'an yu ixlhit'aunat'ik maqancha yu tacha ixp'ut'i'ukxuyanant'ik, chayaycha maqsk'iniy kamak'aunt'ijlat'ikcha. Ni anchanu' putsuku va tacha taun tu'uchun yu niman puch'iy y va x'aman makanukan por yu makaputun. ²³ K'alasast'ik'an-t'ikcha la mijatsukuntik'an kun mijatapastak'atk'an.

²⁴ Kalhilak'at'ayat'ikcha yu sast'i jatsukunti yu paxtoqniy kun Dios. Ex chuncha k'alhits'uk'ut'ik yu laqsaval jatsukunti yu vas junita y ox alin kun Dios. ²⁵ Xlhiyucha klajunau ni jantucha k'alaklk'anant'ik. Aqstanchunin ox vas k'alaxa'alat'ik kun tachun mint'amachaqank'an porke va taun lakatunaj laqxtoqnunau.

²⁶ Tejkan t'al'aunat'ik jantu k'amak'a-t'ik talaqalhin, jantu k'axt'aqk'ant'ik kataqmaqal milhilukujk'an tus

kapu'anchal ni julchan. ²⁷ Jantu k'axt'aqnit'ik lakatin ni aqmoqxnu'.

²⁸ Ta'ayu' yu ix'alhavanan jantucha ka'alhavanal, va kamakal laj'ox lhita-patsa kun ixmaka' para chuncha kalhitsuksuk axtoqnu' yu lay kalakt'a'ul yu tats'anqaniy.

²⁹ Jantu kak'ilt'axt'ut'ik laqxtoqnu' chivinti. Kach'ivinint'ik chivinti vamun yu laj'ox yu lay k'ap'u'aqt'ay'ut'ik yu tamaqsk'iniy para katama'achajul yu taqasmat'a. ³⁰ Jantu kamama'anixvat'ik ix'Espíritu Santo ni Dios. Yucha xt'aqnik'ant'ik para kat'asut'ik ni va laqsaval ixlapanakni k'a'unapitik ni anchanu julchan tejkan kintamalaqtaxtuyan.

³¹ K'amak'aunt'ijla'ot'ikcha tachun yu tus lhits'isiti laqts'inkan, jantucha k'alu-k'ujlat'ik, jantucha kat'al'aunt'ik, jantucha k'amak'at'ik lhilukuj, jantucha kak'ilt'ayanant'ik, jantucha k'alaxk'ay-t'ik. ³² Va lajgal'oxin k'a'unt'ik, k'alhitsu'uk'ut'ik jamapayninti aqstanchunin siya uxiknan y k'alamalaqmixinit'ik chuncha tacha Dios tamalaqmixinin uxiknank'an por Cristo.

Tacha maqsk'iniy katatsukul yu sas'at'an Dios

5 ¹ Kalaqts'i'it'ik makanan tacha makay ni Dios, tacha sas'at'an yu ayaj tapaxkayan. ² Kat'i'unt'ayat'ik makanan japaxkanti vachu va chuncha tacha Cristo kintapaxkan y maqxtaqkal para kanil por kijnank'an tacha taun lapaxkan yu s'ejen'e yu lhipa'iniy Dios.

³ Jantu kat'at'amat'ik lapanakni yu jantu minavink'an kataval, jantu kamaq-t'alhinint'ik, y jantu ka'akch'ip'inint'ik. Nisin ts'uniy ka'alil tacha anchanu' putsuku siya uxiknan porke jantu tapaxtoqniy chuncha katamakal ixlapanakni Dios. ⁴ Jantu kak'ilt'axt'ut'ik chivinti yu lhitamaxanikan nisin yu lhitontoj y jantu k'ach'ivinint'ik yu jantu kun jatapastak'ati. Tachun ni yucha jantu maqsk'iniy. Va kaxt'aqnit'ik lhimalaqquchuncha ni Dios. ⁵ Uxiknan k'ats'aya-t'ikcha ni ta'ayu' yu tat'atamay yu jantu ixnavink'an kaval y yu tamaqtaqalhinin

y yu ta'akcha'an, yu'uncha va yucha ixdiok'an tamakay. Jantu xata'ayu' yu'uncha katatanuyanta ta'an jalhachimo'onun ni Cristo kun Dios. ⁶ Jantu katapumakanun chivinti yu jantu tu'uchun xtapal kaval. Por tachun yu aniy laqtaqal va por yucha kamalaqachaniya' jamaqanlqajnati ni Dios yu chuncha tamakay. ⁷ Xlhiyucha jantu k'alakt'at'anut'ik makanan laqtaqal kun yu'uncha.

⁸ P'unaj ni metsukuntik'an va tacha japuts'isni' ixjunita. Pero chavaycha por ch'antaun t'anumanant'ik kun ni Jalhachimo'onu' va maklk'ut'at'ikcha la metsukuntik'an. Kat'i'ukxunt'ayat'ik tacha sas'at'an yu mapulkuta. ⁹ Ni Espiritu Santo yu tamapulkunitan va kun yucha minachal tachun yu ox ali yu vas jatsukunti ali yu laqsaval. ¹⁰ K'alanit'ik makanan yu kalhipanil ni Jalhachimo'onu'. ¹¹ Jantu kat'a't'i'ukxunt'ayat'ik makanan yu jantu xtapal kaval tacha tamakay yu tatijuyanal laka puts'isni. Va k'alakmak'ats'anit'ik ni va jantu ox yu tamakay. ¹² Va tus lhimaxan k'alhich'ivin yu tamakay laqatamaqsaq. ¹³ Tejkan tu'uchun mata'axtukan ta'an pulkuy ex tachun tasu'ojoy, yu maklku ox masu'ojoy. ¹⁴ Xlhiyucha alin chivinti yu inchine' najun: "K'ak'ujt'icha uxint'i yu lt'at'ay y ka'ost'aycha mas ixnit'acha la metsukunti y Cristo kamapulkuniyan." ¹⁵ Chuncha k'amak'at'ik kuenta tacha t'i'uyanant'ik. Jantu kats'uk'ut'ik tacha lapanakni yu jantu talakpastaknan. Kat'i'unt'ayat'ik tacha lapanakni yu talhit'ajun jatapastak'ati. ¹⁶ K'amak'at'ikcha chavay yu ts'anqay k'amak'at'ik porke chavay ni aniy julchan la alin talaqalhin. ¹⁷ Jantu k'a'unt'ik laktontusna, va k'amala'asit'ik yu najun ni Jalhachimo'onu'. ¹⁸ Jantu kat'a'ap'at'ik porke chuncha pumi'ojoy yu ox la metsukuntik'an, va katalaqtanu'ojon ni Espiritu Santo. ¹⁹ K'alalhixa'alat'ik salmos, himnos, kun milpati yu minachal kun ni Espiritu Santo. K'amilp'anit'ik y k'alhik'ilp'int'ik ni Jalhachimo'onu' kun tachun melhanutk'an. ²⁰ Kaxt'aqnit'ik lhimalaqpuchuncha ni kimPay Diosk'an la ixtaqa'uti ni Jesucristo kiJalhachimo'onuk'an por tachun yu alin.

Tacha maqsk'inii katatsukul ni xapaynin kun xanatin

²¹ Por t'alhauniat'ik ni Dios ex k'ala'alasmakt'ik aqstanchunin.

²² Xanatin, k'alaj'alasmakt'ik mixapayk'an chuncha tacha alasmak'at'ik kiJalhachimo'onuk'an Jesucristo. ²³ Yu xapay va xa'aqtsul junita kun ixanati. Vachu chun ni Cristo va xa'aqtsul junita kun tachun kijnan yu lhakapu'anau yu tacha ixlakatunaj juntau y yucha kintamalaqtaxtuyan. ²⁴ Chuncha tacha ixlapanakni Cristo taqalasmata'ni yucha, vachu chun ni xanatin maqsk'inii kataqalasmak'ol ixapayk'an.

²⁵ Xapaynin, k'alakp'axk'at'ik mixanatik'an vachu va tacha Cristo kintapaxkayan yu ixnavin juntau y maqxtaqkal para kanil por kijnank'an. ²⁶ Chuncha makal para ox kajuu kun Dios yu ixnavin juntau por kintalaqcha'an kun xkan y kintalaqpute'enin ixchivinti. ²⁷ Chuncha makal ni Cristo para ch'antaun ox k'us kajuu kun yucha ni kijnan yu ixnavin juntau. Va para jantu ka'alil ta'an katsaunlhi tu'uchun y nisin ts'unii ch'iyuu kataval y nisin tu'uchun yu jantu ox katasul. Va ox kaval la ketsukuntik'an. Va para ox kajuu kun Dios y sin laqtaqal. ²⁸ Yu xapay maqsk'inii kapaxkal ixanati chuncha tacha yucha paxkakan la ixlakatunaj. Yu paxkay ixanati yucha paxkakan x'aman. ²⁹ Jantu matichun xkajiy ixlakatunaj. Vavakan y ox lhistakkan vachu chun tacha Cristo kintalhistak'an yu ixlapanakni juntau. ³⁰ Ni kijnank'an va ixlakatunaj juntau, va tacha ixvakax kun ixjalukukna juntau. ³¹ Xlhiyucha yu ts'al lakmakajun ixpay kun ixnati y t'atsukuy ixanati para ch'antauncha kataval. Va qayntaun lapanaki tajun por ixla'at'uyk'an. ³² Tachun yu aniy va taun tu'uchun yu lhita'ay ixmalaqasika, pero yu kit'in klhichiviniy va Cristo kun ixlapanakni. ³³ Pero por qayntamin mintachunk'an maqsk'inii kap'axk'at'ik mixanatik'an y yu xanatin maqsk'inii kata-to'oyal ixapayk'an.

S'at'an katato'oyal ixpayk'an

6 ¹ Jas'at'an ka'alasmakt'ik mimpay-k'an kun minat'k'an tacha ka'ala-smakt'ikcha ni Jalhachimo'onu' Jesucristo porke chuncha paxtoqniy. ² “Kat'o'oyat'i mimpay kun minati.” Yucha va yu xap'unaj lhachimo'on yu lhinaul Dios ta'an vachu' naul ni va ox kalaq'aqtayjuya' yu chuncha katamakal. ³ Va naul: “Chuncha k'amak'aye'e para ox k'ats'uk'u y para maqan k'at'i'ukxunt'ay aniy lakamunukpa'.”

⁴ Chavay yu japayan unt'at'ik jantu k'alakmaluk'ujlat'ik mes'at'ank'an. K'alak-masunit'ik y k'alakmalanit'ik tacha lhinajun ni Jalhachimo'onu'.

Oqxtamatin ali ix'ukxtink'an

⁵ Oqxtamatin ka'alasmakt'ikcha mi'ukxtink'an yu t'ap'ats'anayat'ik aniy lakamunukpa'. Kat'o'oyat'ik y kat'alhaunit'ik y k'at'ap'ats'anit'ik kun melhanutk'an tacha k'at'ap'ats'anit'ik Cristo. ⁶ Jantu vamun ox k'at'ap'ats'anit'ik tejkán tamakayan kuenta para chuncha katalhipa'inil ni lapanakni. K'at'ap'ats'anit'ik tacha ix'oqxtamatin Cristo k'a'unt'ik, ex chun mak'ayat'ik la melhanutk'an tacha yu najun Dios. ⁷ Tus achaj k'at'ap'ats'anit'ik tacha kats'uk'ut'ik tapatsaninin ni Jalhachimo'onu' Jesucristo, ex jantu tacha k'at'ap'ats'anit'ik yu vali'iy lapanaki. ⁸ K'ats'ayat'ik yu laj'ox yu tamakay por qayntamin lapanaki yucha ni Jalhachimo'onu' kalaqxtaqnichoqoya' ixlhilhajat'k'an, mas va oqxtamati kaval, mas va ukxtin kaval. ⁹ Vachu uxiknan yu ukxtinin unt'at'ik vachu va chun ox k'alakmak'anit'ik mi'oqxtamatink'an jantu kun laka lhilukuj. Va k'ats'ayat'ik ni mi'ukxtink'an yu vilchal lakt'iyán vachu va yu' ix'ukxtink'an. Yucha va aqstanchunin jalaqts'inin, jantu matichun tumpaj laqts'in.

Yu tap'asta yu kintaxtaqniyan Dios para kalhajau ni aqmoqxnu'

¹⁰ Chavay, ket'alaqaunin, p'as k'amak'ak'ant'ikcha ch'antaun kun ni

Jalhachimo'onu' kun tachun ixtap'asta. ¹¹ K'alak'at'ayat'ikcha kun tachun yu p'as milhilakatayk'an yu taxtaqniyan Dios la metsukuntik'an para chuncha lay ox kat'ayanit'ik tachun yu tamakaniputunan ni aqmoqxnu'. ¹² Jantu lach'apayau kun lapanakni yu talhit'ajun vakax ali jak'alna. Va lach'apayau kun jalhachimo'onun yu jantu lay laqts'inkan, yu talhit'ajun tap'asta, yu laj'ay ukxtinin laka japuts'isni' aniy lakamunukpa' ali yu jantu ox espíritus yu tati'ukxuyanal lakt'iyán. ¹³ Xlhi-yucha kalak'at'ayat'ikcha kun tachun yu p'as milhilakatayk'an yu taxtaqniyan Dios la metsukuntik'an. Chuncha lay ox k'at'ayanit'ik tejkán kachina' ni julchan tejkán la lhita'ay kuna'. Chuncha tejkán k'alach'ap'a'oyapitikcha kat'aylhip'iniyapitik maqantaqninin. ¹⁴ K'alhit'ant'ach'ik'ant'ik yu laqsaval y k'alaqlhit'amp'aq'ak'ant'ik yu vas jatsukunti yu taxtaqniyan Dios. ¹⁵ Vachu' k'ach'ant'anut'ik para listujcha k'a'unt'ik para lay k'alaqlhixa'alat'ik ni lapanakni tas lay laqalaj'ox katataulal kun Dios. ¹⁶ Kun tachun ni aniy, vachu' k'ach'ap'at'ik mimpatanchastuknik'an, yucha va milhaku'atk'an yu lay k'ap'ut'anch'anit'ik. Va yucha k'ap'umamixinit'ik tachun ixpatsajni ni aqmoqxnu' yu tamaktajita yu tapulakat'almayan la metsukuntik'an para k'amak'at'ik talaqalhin. ¹⁷ K'a'aqt'anut'ik yu maqap'asni mi'aqtanutk'an, yucha va ixjamalaqtaxtunti Dios. Vachu k'ach'ap'at'ik xa'espada ni Espíritu Santo, yucha va ixchivinti Dios. ¹⁸ Si k'at'ap'aynini'alhit'ik ni Dios ch'antaun kun ni Espíritu Santo tejkán sk'iniyat'ik Dios y tejkán t'ach'ivinanat'ik. Ox k'alakp'uk'ujt'ik y mas va tavanancha kat'aylhip'int'ik sk'ininin por tachun ixlapanakni Dios ¹⁹ y vachu por kit'in. Chuncha kask'int'ik para kixtaqnil chivinti ni Dios tejkán kchiviniy para chuncha kun ayajnati lay kaklakmak'atsanil ni lapanakni ni ox chivinti yu jantu ixmispakan. ²⁰ Va xlhiyucha kilhimalaqachal

ni Cristo y xlihyucha klhimanukal laka pach'in. Kilalhitapayniu para kaklhichivinil kun ja'ayajnati tacha maqsk'iniy kakchivinil.

Jalakmastak'ay ni Pablo

²¹ Tachun yu ktapasay ni kit'in yucha katamak'atsaniyan ni Tíkiko yu kilaqajk'an yu paxkayau. Yucha lay lhakapu'anikan y ox taylha'an tapatsanini' ni Jalhachimo'onu'. ²² Va xlihyucha

klalhimalaqachanitacha'au para katamak'atsanin yu ktapasayau ni kijnan y katamalaka'ulanin melhanutk'an.

²³ Yu kimPay Diosk'an kun yu Jalhachimo'onu' Jesucristo oxamaktamin kalakmakal yu talhakapu'an y kalakmapaynil y kalaqxtaqnil jalhakapu'ati.

²⁴ Kalakmapaynil ni Dios tachun yu ta'achaniy kiJalhachimo'onuk'an Jesucristo yu tataylha'an achanin. Va chuncha kaval.

Ni Chivinti yu Jalaqts'oqnil Pablo Ixlapanakni Dios yu Tavilanal Filipos

Ni Pablo jalakmastak'ay ixlapanakni Dios yu tavilanal Filipos

1 ¹ Kit'in kPablo kun Timoteo ix'oqxtamatin Jesucristo kuntu. Klama-stak'ayau mintachunk'an yu ixlapanakni Dios unt'at'ik por yu makal Jesucristo, yu vilanant'ik laka putaulan Filipos. Vachu' yu xalaj'aynin yu talhakapu'an ali yu ta'aqtayjunun. ² Katamayaynin y oxamaktaun katamakan ni Dios kimPay-k'an kun kiJalhachimo'onuk'an Jesucristo.

Ni Pablo sk'in Dios por yu'uncha

³ Kit'in ikxtaqniy lhimalaqpuchuncha ni kimPay Diosk'an tejkan klapastak'au. ⁴ Tejkan iksk'in Dios por mintachunk'an va iksk'in kun ahati. ⁵ Va ch'antaun kilat'atapatsayau para kalaqpute'ekal ni ox chivinti yu lhichiviniy Cristo. Aqt'aynit'ik tejkan lhak'ap'up'int'ik tus chavaycha vananaj ox t'aylhip'inat'ik. ⁶ Ni Dios aqtayl tatapatsaniyan la metsukuntik'an. Kit'in ox ijk'atsay yucha kataylhaana' tus tejkan kaminchoqoya' ni Jesucristo. ⁷ Kit'in chuncha laqsaval ijk'atsay, va por kla'achaniyau kun tachun la kelhanuti. Ni Dios tamapayniyan mintachunk'an, vachu chun tacha kimapayniy ni kit'in tejkan iktanuy laka pach'in o tejkan klhi'eltsajuy yu ox chivinti y ikmasuy ni va laqsaval. ⁸ Ni Dios ox k'atsay ni kit'in ayaj klalaqts'inputunau mintachunk'an, va kla'achaniyau kun ixjapaxkanti ni Jesucristo. ⁹ Kit'in iksk'iniy Dios para kalalhaval mepaxkantik'an y vachu para ox k'alakp'ast'aknant'ik y tachun k'amisp'at'ik ¹⁰ para k'alaksakt'ik vamun yu laj'ox. Chuncha jantu kalhitayal yu jantu ox la metsukuntik'an y vachu jantu k'amuk'anik'ant'ik laqtaqal tus tejkan

kaminchoqoya' ni Cristo. ¹¹ Ex tachun yu k'amak'ayapitik si laj'ox kaxajtachal la metsukuntik'an para ay kamakakal ni Dios y vachu' kato'oyakal.

Ni Pablo vamun ni Cristo maqsk'iniy la ixjatsukunti

¹² Ket'alaqaunin, ni kit'in va klama-k'atsaniputunau ni tachun yu aniy klhitapasay va xlhiyucha talhavay ixlaqpute'eka yu ox chivinti. ¹³ Chuncha tachun ni tropas yu tatapatsay laqa ay chaqa' kun tachun yu alati lapanakni, yu'uncha tak'atsa'ojoy ni kit'in klhich'ikanta ixlhitapatsa ni Cristo. ¹⁴ Qaynlhuu ket'alaqaunin tak'atsaycha ni ikch'ikanta ni kit'in. Xlhiyucha jantucha tatalhanan katalaqpute'el ixchivinti Dios. Va apalay talhakapu'an kiJalhachimo'onuk'an y tatap'aysnin.

¹⁵ Laqsaval lati talaqpute'ey ixchivinti ni Cristo va por kinta'akcha'aniyan y kintaxkayan, pero yu alati yu talaqpute'ey, va laqsaval tamakaputun yu laj'oxi lhitapatsa. ¹⁶ Yu talaqpute'ey ixchivinti Cristo kun akcha'ati, yu'uncha laj'ay tanajun kamakakal y va t'uy jatapastak'ati tamakay. Chuncha tamakay por tanajun apalay kakmaqanlqajnal ni kit'in aniy laka pach'in. ¹⁷ Pero yu alati talaqpute'ey ixchivinti Cristo kun japaxkanti. Va tak'atsay ni aniy ikvil laka pach'in para kajklhi'elts'aul yu ox chivinti yu lhichiviniy Cristo. ¹⁸ ¿Exni? Mas lati va t'uy ukxpu' tamakay y lati vas tachiviniy pero yu oxlaqt'uy si laqsaval talaqpute'ey ni Cristo y yucha klhi'achantajuy ni kit'in.

Chavay apalay kajk'achana'. ¹⁹ Ni kit'in ox ijk'atsay ni tachun yu klhitapasay la ox kaxajtachal por sk'iniyat'ik Dios, vachu por ni aqtayjunti yu

kixtaqniy ix'Espíritu ni Jesucristo. ²⁰ Ni kit'in ijk'atsay y ox ikpakxan'iy ni jantu kakhimaxanana' por yu kakhitapasaya'. Va iknajun ni jantu kaktalhanal y ay kakmakal ni Cristo la ketsukunti, mas ikt'ajun u mas kaknil. ²¹ Ni kit'in vamun ni Cristo ikmaqsk'iniiy la ketsukunti. Mas kakniya', kakhajaya' yu apalay ox. ²² Pero incha iktaylha'an tsukunu' aniy lakamunukpa' ex vananaj lay kakhitapatsaniya' ni Dios. Xlhiyucha jantu ijk'atsay tichichuncha kakhaksaklhi, o va kaknil o vananaj kaktasukul aniy. ²³ Va t'uuy jatapastak'ati klhit'ajun. Va iktaxtuputuncha aniy lakamunukpa' para kakt'ataulchalcha ni Cristo. Ex chuncha apalay ox kaval para kit'in. ²⁴ Pero uxiknan apalay maqsk'iniiyat'ik para kaklat'ati'ukxuntayau aniy la kilakatunaj. ²⁵ Xlhiyucha la ox ijk'atsay ni kaktamakauna' y kaktaylha'ana' kun uxiknan para katalhaval milhakapu'atk'an y k'alhits'uk'ut'ik lhuu achati por lhak'ap'up'inat'ik. ²⁶ Ex chuncha tejkan klalaqchanchoqoyau aaqtaun ex kalhi'ach'ant'a'uyapitik por yu kimakaniiy kit'in ni Cristo Jesús.

Kat'i'ukxunt'ayat'ik tacha lhinaunkan

²⁷ Kat'i'ukxunt'ayat'ik makanan tacha paxtoqniy kun yu ox chivinti yu lhichiviniy Cristo. Ex chuncha va ch'antaun ka'napitik. Chuncha kajk'atsaya' incha klalaq'anau o mas maqati kaktaulal y chuncha kintajunin. Ex ch'antaun k'at'ap'ats'ayapitik kun tap'asta para katalhakaapu'al ni ox chivinti yu lapanakni. ²⁸ Jantu kat'alhaunit'ik yu talaktanchaniyan. Ex chuncha katak'atsaya' ni va katats'anqaya' ni yu'uncha y yu uxiknan k'alaq'axt'uyapitik por ixtap'asta ni Dios. ²⁹ Ni Dios taxtaqniyan taun jatapayniti jantu vamun para kalhak'ap'up'int'ik ni Cristo, vachu para k'ama'anl'ajnant'ik por yucha.

³⁰ Uxiknan vachu t'ap'asayat'ik yu lhita'ay la metsukuntik'an, vachu va tacha yu kit'in iktapasal. Chuncha kilalaqts'iu y chavaycha k'ats'ayat'ik yu ikt'ajun tapasana'.

Ni Cristo x'aman malakat'unikal ex astan ni Dios ay makal

2 ¹ Ni laqsaval tamalaka'ulayan ni Cristo, tapaxkayan, vachu tamaqxto'an ni Espíritu Santo, y vachu la'ach'aniyat'ik y lap'axk'ayat'ik. ² Ex chavaycha para apalay kilamalhi'achajuu, va klask'iniyau ni ch'antaun kamak'at'ik mijatapastak'atk'an. Va aqstanchun kalap'axk'at'ik. Ch'antaun kamak'at'ik metsukuntik'an. Va ch'antaun kaval mijatapastak'atk'an. ³ Jantu tu'uchun k'amak'at'ik para kalama'alla'at'ik. Jantu ay kamak'ak'ant'ik, va kun kilpatiti kalat'o'oyat'ik yu alati tacha apalay laj'ay kataval jantu uxiknan. ⁴ Jantu k'alakxk'aut'ik vamun yu maqsk'iniiyat'ik. Vachu' k'alakxk'aut'ik yu tamaqsk'iniiy yu alati. ⁵ Va chuncha k'alakp'ast'aknant'ik tacha ixjapastak'ati ni Cristo Jesús. ⁶ Mas ixjatsukunti ni yucha va ixjatsukunti Dios, pero jantu kalhinaul ni maqsk'iniiy kalaqts'inkal tacha Dios. ⁷ Va makauntijlalcha yu ixnavin, ixjatsukunti va ixjatsukunti oqxtamati val, y tsukulcha tacha lapanaki. ⁸ Tejkan ixti'ukxuyal tacha lapanaki, yucha malakat'unikal x'aman. Ni yucha ox ixqalasmaknan mas lhijunkal para kamaqxtaqkal para kanil laka kurus. ⁹ Xlhiyucha ni Dios la'ayal y xtaqnil ixtaqa'uti yu apalay to'oyakan xajantu ixtaqa'uti matichun aqayntaun lapanaki. ¹⁰ Ex chuncha tejkan kalaqpute'ekana' ixtaqa'uti ni Jesús, katata'aqts'oqqtaniya' tachun yu tavilanal lakt'iyani ali yu tavilanal lakat'un y mas va laqni. ¹¹ Vachu' chuncha tachun katamispal y katanaul ni Jesucristo va Jalhachimo'onu', ex chuncha kato'oyakana' ni kimPay Diosk'an.

Ixlapanakni Dios va tacha jast'akun tajunita aniy lakamunukpa'

¹² Ex chuncha uxiknan yu kla'achaniyau, tacha aqsliaj kilaqalasmatau tejkan klat'ataulau, chavaycha mas

jantu klat'ataulau, apalay kilaqalasmatau. Kalaqlt'ap'ats'at'ik yu maqsk'iniy y kata-pastak'un ni k'alaqt'axt'u'ot'ik. ¹³ Va Dios yu tapatsay la metsukuntik'an para kala-k'anaunt'ik yu lhinajun y para lay kama-k'at'ik. ¹⁴ Tachun yu mak'ayat'ik jantu kamak'at'ik kun lhilukuj y jantu kamak'at'ik kun lhuu lakchivinti. ¹⁵ Ex chuncha jantu katamuk'anin milaqtaqalk'an, y jantu kalhitayal yu lakxkiliu la metsukuntik'an. K'a'unt'ik yu laqsaval sas'at'an Dios. Va lakt'avilanant'ik yu talaktu'unun lapanakni yu chavaycha tat'ajun, xlhi-yucha k'a'unt'ik tacha jast'akun yu ox k'uliksna' tasuy aniy lakamunukpa'. ¹⁶ Ox kat'aylhip'int'ik tacha lhinajun ni chivinti yu xta'a jatsukunti. Ex chuncha tejkan kaminchoqoya' ni Cristo ayaj kajk'achana' por uxiknank'an. Ex jantu vali'iy kaval ni klamasanu ixchivinti Dios y iktapatsal kun tachun kintap'asta. ¹⁷ Mas kankil, ni kit'in kakval tacha taun lapaxkan y vachu chun metsukuntik'an va tacha taun jamoq-slanti junita. Va lhak'ap'up'inat'ik y maqxt'aqnit'ik metsukuntik'an ni Dios. Ex chuncha mas kankil ayaj klhi'achantajuy ni kit'in ch'antaun kun mintachunk'an. ¹⁸ Va xlhiyucha lhi'ach'ant'a'uyat'ik ch'an-taun kun kit'in.

Ni Timoteo ali Epafrodito

¹⁹ Incha kiJalhachimo'onuk'an Jesús najun, ex niman klamalaqachaniyau ni Timoteo para vachu' oxamaktaun kakval tejkan kajk'atsaya' ni ox alint'at'ik. ²⁰ Aniy jantu alin aqayntaun lapanaki yu chuncha k'atsan tacha kit'in, laqsaval kapastak'ul por uxiknank'an. ²¹ Tachun vamun tamakaputun yu yu'uncha talhipa'iniy. Jantu tamakaputun yu lhinajun ni Jesucristo. ²² Pero uxiknank'an misp'ayat'ik ni ayaj qal'ox ni Timoteo. Ni yucha ox ki'aqtayjuy ni kit'in para kalaqpute'ekal ni ox chivinti yu llichiviniy Cristo, vachu chun tacha qayntaun ts'al yu ox aqtayjuy ipxay. ²³ Xlhiyucha klamalaqachaniputunau ni yucha, pero p'unaj kajk'atsa'elaya' tisuncha kaktapasayacha. ²⁴ Pero ox ijk'atsay incha najun ni kiJalhachimo'onuk'an Jesús, ka va klalaq'antacha'au ni kit'in vachu'.

²⁵ Kit'in klhilay ni ox kaval kakla-malaqachanichoqoo vachu' ni Epafrodito yu kilaqajk'an. Yucha kint'atapa-tsay tacha kint'atropa la ixlhitapatsa Dios. Va yucha yu mala'ach'at'ik aniy para ki'aqtayjul yu xakmaqsk'iniy. ²⁶ Yucha ayaj talaqts'inputunan, xlhi-yucha klamalaqachanichoqoyau. Yucha k'atsal ni uxiknan k'ats'at'ik ni va ixtaqan'ay, xlhiyucha pastak'uy por uxiknan. ²⁷ Laqsaval ixtaqan'ay y va laycha ixnil. Pero ni Dios mapaynil y vachu kimapaynil ni kit'in para jantu apalay kakmaqaninil. ²⁸ Xlhiyucha niman klamalaqachanichoqoyau para k'alhi'ach'ant'a'ut'ik tejkan k'alaqts'in-ch'o'oyapitik. Ex chuncha ni kit'in jantu kaktaula' kun jamaqaniti. ²⁹ Kala'a'it'ik ni yucha kun chux la me'achatik'an tacha ixlapanaki kiJalhachimo'onuk'an Jesús. K'alakt'o'oyat'ik yu alati lapanakni yu chuncha tajunita tacha yucha. ³⁰ Yucha va laycha ixnil por ixlhitapatsa ni Cristo. Laqsaval ixmaqxtaqputun ixjatsukunti ta'an ayaj lhita'ay xakt'aunau. Chuncha yucha ki'aqtayjul mas uxiknan jantu lay ixkila'aqtayjuyau por maqati vilanant'ik.

Ni lapanakni yu laqsaval ixnavin Dios tajunita

3 ¹ Ex chuncha, ket'alaqaunin va k'alhi'ach'ant'a'ut'ik ni kiJalhachimo'onuk'an Jesús. Jantu kinchaaniy klats'oqniqoyau aaqtaun tacha yu klats'oqniu p'unaj, va ayaj xtapal k'a'a-smakch'o'ot'ik. ² K'alhist'ajk'ant'ik para jantu katamakanun ni anchanu' lapanakni yu tacha jalaktu'unu' x'oyun tajunita, yu jantu ox tamakay. Yu'uncha talhinajun maqsk'iniy kaxvililich'uk'up'uxnik'ant'ik tacha lhinaunkan laka lhachimo'on. ³ Yu kijnank'an va yu laqsaval ixlapanakni Dios juntuau. To'oyayau ni Dios la ketsukuntik'an y lhi'achantajuyau ni Cristo Jesús y jantu pastak'au ni lay kamakau tu'uchun la kilakatunajk'an para oxicha kajuu kun Dios. ⁴ Kit'in xakmakay ixlhachimo'on Moisés. Incha matichun lapanaki najun

ni kapulaqtaxtul por makay yu lhinaunkan, ex kit'in apalay. ⁵ Va ikxvillichuk'up'uxnikal tacha lhinaunkan, tejkán laqatsajincha julchan val tejkán iksukul. Va israelita ijkunita, va ikminchal kun Benjamín y vachu ikchiviniy yu lhihebreo yu ixchiviniy kimpay. Vachu' va fariseo xajkunita, xlihyucha xakmaka'ojoy ixlachimo'on Moisés. ⁶ Vachu' laqatap'asta xaklaqmamaqanlqajnivay yu ixtalhaka-pu'an ni Cristo y jantu tu'uchun ixkints'an-qaniy yu tacha lhinaunkan la kilhachimo'onk'an. Jantu matichun ixlay kintamuk'anin laqtaqal. ⁷ Tachun yu anu' yu xakmakay va ayaj xtapal xakhlilay, pero taval va por Cristo ikmakauntijla'ol tacha jantucha xtapal kaval. ⁸ Chavaycha apalay ikmaqats'anqa'ojotacha tachun para apalay kakmispal ni Jesucristo kiJalhachimo'onu'. Vamun xtapal kamisp'at'i ni yucha. Va por yucha klaqmaqats'anqal tachun y chavay klaqts'in va tacha jamakxtalcha. Ex chuncha vamun ni Cristo ayaj xtapal junita para kit'in. ⁹ Chuncha yucha ixlapanaki kunita. Ox kilaqts'in ni Dios, jantu va por ikmakay yu lhinaunkan, va por klhakapu'an ni Cristo. Va Dios yu kimaxtuni'ol kilaqtaqal por klhakapu'al ni Cristo. ¹⁰ Vamun yu' ikmispaputun para chuncha ka'alil la ketsukunti ni anchanu' tap'asta yu pumajukuchoqokanta laka janinin ni Cristo. Vachu' para kakmaqanlqajnal tacha lhamaqanlqajnal ni yucha. Chuncha kunputun tacha ixjunita ni Cristo tejkán nil ¹¹ para chuncha lay kajkuj-choqol tejkán katakuja' ni janinin.

Ni Pablo va taylha'an para lay kalhahal

¹² Laqsaval ni kit'in jantuka' iknajun va ikmaka'ojoy tachun yu maqsk'iniiy, vananaj alin yu kints'anqaniy. Pero va iktaylha'an para lay kaklhahal ni anchanu. Va xlihyucha kilaksaklhi ni Jesús. ¹³ Ket'alaqaunin, jantu iknajun incha klhajatacha. Pero va putaun yu ikmakay. Ikmakauntijlay yu tapasatacha y ikmakaputun kun kintap'asta yu vananaj ts'anqay ¹⁴ para kakcha'al ta'an maqsk'iniiy para chuncha kaklhahal yu najun ni Dios kintaxtaqniya' por yu makal ni Jesucristo.

¹⁵ Kijnank'an yu oxicha lhaka-pu'anau chuncha maqsk'iniiy kapastakvi. Incha alin tu'uchun yu jantu chuncha p'ast'ak'at'ik tacha ikpastak'a kit'in, ex ni Dios katamasuniyan yu laqsaval. ¹⁶ Pero maqsk'iniiy kataylha'au makana' tachun yu mispataucha.

¹⁷ Ket'alaqaunin, kilalaqts'i'iu la kimputsuku. Vachu' k'amak'at'ik kuenta tas junitacha ixputsukuk'an ni lapanakni yu chuncha tati'ukxuntayay tacha klamasuniu. ¹⁸ Va aqlhuu xaklajunau ni la alin lapanakni yu talhilay va jantu xtapal kaval mas nil Jesús laka kurus. Chavaycha tus ijqalhun ni klajunchoqoyau aaqtaun, ni yu'uncha ¹⁹ katats'anqaya' tejkán kataniya'. Vamun tamakaputun yu lhinajun ixlakatunajk'an tacha ixdiosesk'an kaval. Laj'ay talhik'atsan yu maqsk'iniiy katalhimaxanal. Vamun tapastak'a yu alin aniy lakamunukpa'. ²⁰ Pero kijnank'an va machaqan lakt'iyán juntu. Pakxan'iyau ni ancha kamintachal yu kintamalaqtaxtuyan, yucha va kiJalhachimo'onuk'an Jesucristo. ²¹ Kilakatunajk'an yu chavaycha lhit'aunau va tats'anqaniy tap'asta. Ex yucha sayst'i kintamakaniyan kilakatanajk'an vachu chun tacha ixlakatunaj ni yucha. Va chuncha kamakaya' kun ixtap'asta yu kapulhachimo'onuna' tachun.

Kalhi'ach'ant'a'ut'ikcha ni kiJalhachimo'onuk'an Jesús

4 ¹ Ket'alaqaunin, xlihyucha chuncha maqsk'iniiy ox kat'aylhip'int'ik kun kiJalhachimo'onuk'an Jesús. Ni kit'in klapaxkayau ni uxiknank'an y vachu' ayaj klalaqts'inputunau. Va klalhi'achantajuyau ni uxiknan, va tacha kilhilihajati unt'at'ik.

² Klaksk'iniiy ni Evodia ali Síntike ni ch'antaun katamakal ixjatapastak'atik'an. Chuncha tamaqsk'iniiy yu ixlapanakni ni kiJalhachimo'onuk'an Jesús.

³ Vachu' iktapayniniyan ni uxint'i, yu ox kint'a'oqxtamati k'at'i, va iknajun ni kalaq'aqt'ay'ut'i anchanu' xanatin para ch'antaun kataval. Ni yu'uncha ayaj kint'atapatsal ixlaqpute'eka ni ox

chivinti yu lhichiviniy Cristo. Vachu ayaj ixtat'atapatsay ni Clemente ali yu alati yu ixkinta'aqtayjuy. Yu'uncha jalaqts'oq'ulanikantacha ixtaqa'utik'an la xalibro jatsukunti.

⁴ Kalhi'ach'ant'a'ut'ikcha por ni kiJalhachimo'onuk'an Jesús. Aaqtaun klajun-choqoyau: ¡K'alhi'ach'ant'a'ut'ikcha!

⁵ Katak'atsanin tachun ni lapanakni ni va qal'oxin lapanakni unt'at'ik. Va uksts'u-niycha minta ni kiJalhachimo'onuk'an.

⁶ Jantu tu'uchun katapastak'un. Kask'int'ik Dios, kamak'ats'anit'ik Dios mintapaynit-k'an. Va si kaxt'aqnit'ik lhimalaqpuchuncha. ⁷ Ex chuncha ni Dios kataxtaq-niyan oxamaktaun jatsukunti yu apalay ox yu jantu matichun lay malaqasiy. Chuncha ni Dios kalhistak'a' melhanutk'an kun mijatapastak'atk'an por yu makal ni Cristo Jesús.

**Kap'ast'akt'ik vamun yu laj'ox
kun yu lay to'oyakan**

⁸ Chavay, ket'alaqaunin, kap'ast'akt'ik vamun yu laj'ox kun yu lay to'oyakan. Kap'ast'akt'ik tachun yu laqsaveal ali tachun yu to'oyakan ali tachun yu vas junita ali tachun yu mispakan tacha ox ali tachun yu ixlaqmiti ali tachun yu ox lhichivinkan. ⁹ Yu klamasuniu, yu la'a'it'ik ali yu asmakt'ik, ali yu kilalaqts'intau la kimputsuku, va yucha kamak'at'ik. Ex chuncha ni Dios yu oxamaktaun makanan, yucha katat'ataulan ch'antaun kun uxiknan.

**Ni Pablo paxkajlaqa'iy
yu tamalaqachanil**

¹⁰ Ayaj klhi'achantajuy ni kiJalhachimo'onuk'an Jesús porke ni uxiknank'an p'ast'akt'ik ni kila'aqtayjuchoqoyau. Si ixkilapastak'au pero chavaycha lay kila'aqtayjuchoqoyau. ¹¹ Kit'in jantu iknajun incha alin yu ikmaqsk'ininy. Va klhi'achantajuy yu klhitsukey y si oxamaktaun iktijuntayay. ¹² Kit'in ikmispay tas laycha kakputaulal kilhikilpatiti y vachu tas laycha kakputaulal kilhimaqaliti. Mas va tichun iktapasaycha la

ketsukuntik'an, ni kit'in klani'ojota y oxamaktaun k'alinta mas kajk'otsal o kakchavanil, mas lhuu kakmaqalil o kakmaqanlqajnal kun kilpatiti. ¹³ Kit'in va tachun lay iktayaniy, va por Cristo yu ki'aqtayjuy. ¹⁴ Pero ox mak'at'ik tejkán kila'aqtayjuu y chuncha kilat'amaqanlqajnanau.

¹⁵ Uxiknan yu machaqan Filipos unt'at'ik, k'ats'ayat'ik ni tejkán iktaxtul la milakat'un Macedonia, va xajk'anta laqpute'eni ixchivinti Dios. Jantu matichun ki'aqtayjul, mas yu alati yu talhakupuan. Vamun uxiknan kilamalaqachaniy milapaxkank'an, va por ox ixp'axk'alaqts'inat'ik yu la'a'it'ik. ¹⁶ Vachu tejkán vananaj xakvilchal laka putaulan Tesalónica, aqtamin aqt'iyun ixkilamalaqachaniyau yu xakmaqsk'ininy. ¹⁷ Pero ni kit'in jantu incha vamun ikpastakta kaklask'inu tu'uchun. Va iknajun apalay katalhaval milhilhajatik'an kun Dios por yu ox mak'ayat'ik.

¹⁸ Chavaycha klaqa'il tachun yu ikmaqsk'ininy tus kixajnichal. Tus lhi'oqslay yu kilaxtaqniu yu kilhiminil ni Epafrodito. Yu kilamalaqachaniy va tacha taun tu'uchun yu s'ejen'e para Dios, tacha taun ox jamoqlanti yu lhipa'ininy. ¹⁹ Ni kimPay Diosk'an yucha kataxtaqniyan tachun yu katats'anqaniyan, va tacha ayaj maqalinin, chuncha tacha tasuy la ixjatsukunti ni Cristo Jesús. ²⁰ Va la ay kamakakal ni Dios yu kimPayk'an mas va tavanancha, jantu aqtaun kata-maktal. Va chuncha kavalcha.

**Ni Pablo jalakmastak'achooqy
yu talhakapu'an**

²¹ Kalakmast'ak'at'ik por kit'in tachun ixlapanakni Dios por yu makata ni Cristo Jesús. Vachu' tamastak'ayan ni ket'alaqaunin yu aniy kintat'avil.

²² Tamastak'ayan tachun yu aniy ixlapanakni Dios tajunita. Yu apalay tamastak'ayan va yu tatapatsay la ix'aychaqa' ni César yu ay jalhachimo'onu'. ²³ Va kata-mapaynin ni Jesucristo mintachunk'an. Chuncha kavalcha.